

Sra. Giselle Netto di Fundacion Pro Bida

Aborto cerca nos hobennan lo refleha consecuencia pa nos comunidad

ORANJESTAD - Aborto cerca nos hobennan tin un consecuencia, cu ta refleha consecuencia pa nos comunidad. Esaki ta segun sra. Giselle Netto, vocero di fundacion Pro Bida.

Aunke cifranan oficial no tin, considerando cu aborto no ta permiti legalmente na Aruba; pero e casonan ta sosodiendo mas frecuente cu hendenan ta aborta. E impresion ta cu pa yega di haci esey ta hopi facil actualmente, sin pensa riba e consecuencianan cu e tin pa cu e persona cu ta hacie, pa su famia y pa comunidad, segun sra. Netto.

Desesperacion

E ta indica cu pa comunidad cada aborto tin un consecuencia, ya cu e ta refleha cu e hobennan ta hopi tristo cu nan ta yega na e punto extremo di dicidi pa aborta. Hopi biaha nan tin desesperacion of mal consejo den e camindanan robes.

Caso tristo

Fundacion Pro Bida a tuma nota di e caso caminda un hobencita desespera kier a consumi producto di limpieza pa deshaci di su bariga. Sra. Netto kende ta fungi como vocero di e fundacion aki ta haya cu e caso aki ta refleha un problema cu ta andando no for di awor sino pa añanan cu e diferencia cu awor e ta sali mas na publicidad tocante aborto.

Amistad

“Hopi biaha por ta amistad ta conseha nan pa haci tal y tal cos y sin tene na cuenta ey ki consecuencia e ta bay tin pa nan den futuro”, el a laga sa. Sra. Netto ta agrega cu un caso manera e hoben cu a purba bebe Desiclin pa baha su bariga, ta un accion tristo di trata di interumpi un embarazo no desea. “Ta parce, segun sra. Netto, cu balor di bida ta birando menos”. Y e tin su base riba e compromedimento di kico bida ta y e pensamiento liberal cu nos por dicidi pa nos mes kico

nos ta haci cu nos bida y cu nos culpa ta wordo consolida actualmente.

“E ta mi culpa, mi ta haci locual mi kier cu mi culpa y bo ta haya extremo cu e cantidad di aborto ta aumenta mas y mas...”

Consecuencia di aborto

El a bisa cu e consecuencia di aborto ta varios y riba tur aspecto. Tin consecuencia spiritual, emocional y fisico.

E ta resalta cu hopi investigacion a wordo haci caba y vooral den otro paisnan a señalá cu un mucha muhe cu a practica aborto den e prome 10 aña eventualmente nan no ta ripara nada, pero mayoria di hende muhe cu a pasa den e proceso traumatico aki un pa otro momento ta bay arepentí.

Igualmente e ta bira depresivo y tin biaha nan ta haya daño fisico y consecuentemente nan lo confronta den futuro problema cu otro embarazo.

Esaki ta sosode cu regularidad ora cu e hobencita a pasa den un of varios aborto, ya cu e por haya problema cu su matriz y tambe e criatura por nace cu defecto.

Pa loke ta consecuencia di un aborto pa salud di un persona a keda demostra cu basta cantidad di cancer di pecho tin su rijs den e practica aki. Pero sra. Netto a resalta cu otro consecuencia ta spiritual ya cu e criatura ta un ser humano den bo culpa y cu no ta pertenece na bo.

“E ta un yiu di Dios cu un bida. Kiermen esey ta e mandamento no mata y bo a mata un ser humano...”, el a bisa. E ta argumenta cu e criatura por ta ainda no tin apariencia di un baby, pero e ta un baby. Riba e tereno aki ciencia pa hopi tempo a yega na un acuerdo cu bida ta cuminsa na e momento di e Concepcion, segun sra. Netto.

Pro Bida

Pro Bida ta un fundacion cu



a ser lanta casi cinco aña pasa bou e dak di Parokia di Dakota. Nan ta un fundacion Catolico, y nan a ser lanta den seno di e parokia aki pa duna conscientisacion di kico bida ta, na ki momento e ta cuminsa, y consecuencianan ta di aborto, kico aborto ta, y e manera con nan ta wordo haci.

Pro Bida ta sali for di punto di bista cu “bo mester respeta bida for di Concepcion te na morto natural”, sra. Netto a indica. Pues e punto di bista aki no solamente ta inclui aborto sino e parti di eutanasia tambe. Pa Pro Bida nos mester defende bida bou cu-alkier circunstancianan. □